

SRVI SBK - Izvještaj o radu za 2025. godinu

Poštovani,

Nakon niza naših izvještaja koje smo započinjali sa negativnim stavovima i činjenicama o unaprijeđenju statusa i položaja RVI u okviru Federacije BiH, odlukom Vlade FBiH i Parlamenta BiH donesenih početkom 2026. godine, u tekućoj godini je planirano povećanje invalidnina za više od 17%, a došlo je i do izmjena i dopuna drugih boračkih zakona koji idu u korist RVI i drugim boračkim kategorijama. Vlada Federacije BiH isplatila je i jednokratne novčane pomoći svim RVI od po 200 KM, nakon višemjesečnih pritisaka RVI, pa na početku ovog izvještaja, za razliku od mnogih prethodnih, moramo priznati da određene stvari kada su u pitanju RVI i druge boračke kategorije idu u pozitivnom smjeru. Izmjenama zakona o prijevremenom i povoljnijem penzionisanju konačno je ispravljena nepravda prema RVI 60% i više, čiji je uzrok invalidnosti ranjavanje i koji su proglašeni vojno nesposobnim. Vlada i Parlament Federacije BiH otišli su i korak dalje, te su izmjenama gore navedenog zakona, omogućili pravo na prijevremenu i povoljnu penziju za sve RVI 60% i više, čiji je invaliditet prouzrokovan ranjavanjem, tako da će na ovaj način pravo na penziju ostvariti oko 3000 RVI u BiH. I na kraju, borbom čelnih ljudi Saveza RVI Federacije BiH, uspjeli smo sačuvati i trenutni nivo prava na prijevremenu i povoljnu penziju koju će ostvariti svi RVI koji ovo pravo ostvare na osnovu odredbi "Zakona o osnovnim pravima boraca", odnosno sa 55 godina starosti i 15 godina radnog staža (uključujući 3 godine koje im dokupljuje Biro za zapošljavanje FBiH). Pored navedenog, vode se aktivnosti i po pitanju vraćanja statusa RVI koji su po osnovu ranjavanja imali taj status, ali im je isti ukinut u mnogobrojnim revizijama ili po tzv. službenoj dužnosti. Iskreno se nadamo da će i ovaj problem biti riješen i da će se ovim ljudima omogućiti ponovni izlazak na Institut za medicinsko vještačenje, te im se vratiti status RVI sa minimalno 20% vojnog invaliditeta. Naše konstatacije da se rješavanje problematike RVI i drugih boračkih kategorija na nivou Federacije moraju rješavati u koordinaciji sa HVIDR-om i drugih boračkim organizacijama HVO, pokazale su se tačnim, što pokazuju i gore navedeni pozitivni primjeri i odluke Vlade i Parlamenta Federacije BiH. Kako je HVIDR-a FBiH vrlo zainteresovana da se u prava vrate ranjeni i zarobljeni RVI, kojima je ovaj status na bilo koji način u međuvremenu ukinut, sigurni smo da će i ovo pitanje od velikog značaja za sve ranjene ili zarobljene pripadnike ARBiH i HVO, biti vrlo brzo riješeno.

Nije nam jasan razlog zbog čega se još uvijek "čeka" sa parlamentarnom procedurom donošenja "Zakona o organizacijama od posebnog interesa za FBiH" koji bi trebao odrediti "reprezentativnost" predstavnika boračkih kategorija kako na nivou FBiH, tako i nižim nivoima organizovanja boračkih populacija. U našem prošlom izvještaju jasno smo istakli da opstrukcija donošenja ovog zakona ima svoju političku pozadinu, kao i to da se navedeni zakon neće ni donijeti, barem u mandatu aktuelne vlasti u Federaciji BiH jer je očito da mogućnost formiranja kojekakvih boračkih udruženja i organizacija koje uglavnom imaju status "društva jednog lica" još uvijek odgovara pojedincima ili pojedinim politikama na vlasti. Pored navedenog, naš Savez je inicirao izmjene i dopune "Zakona o osnovnim pravima boraca" kojima tražimo izmjenu koeficijenta za isplatu invalidnina za kategorije vojnih invalida od V. – X. grupe, kako bi konačno najniža invalidnina došla na nivo od 100 KM za RVI X. grupe.

Želeći na određeni način pohvaliti aktivnosti Saveza RVI FBiH u odnosu na prošlu godinu, u nastavku našeg Izvještaja više ćemo se baviti radom naše organizacije na kantonalnom nivou. Na nivou SBK, zajedno sa Upravom za BIZ SBK učinili smo sve da povećamo budžetska sredstva Uprave u odnosu na predhodne godine, što smo i uspjeli, jer su ista uvećana za gotovo 1 milion KM

SRVI SBK - Izvještaj o radu za 2025. godinu

u odnosu na prošlu godinu. Želeći još više unaprijediti status i položaj našeg članstva, činimo sve da kroz izmjene i dopune zakona o dopunskim pravima boraca definišemo što veći broj realnih i provodivih dodatnih prava našeg članstva, te konačno uvođenje u sva dodatna prava boračkih kategorija SBK, naših kolega iz tzv. rubnih općina manjeg BiH entiteta, koji do sada nisu bili obuhvaćeni ovim zakonom. Izmjenama i dopunama navedenog zakona, po skraćenoj proceduri uspjeti smo u budžetu SBK za 2026. godinu obezbjediti oko 300.000 KM namijenjenih najtežoj kategoriji RVI – 100% - I. grupe kao i drugim kategorijama RVI koji ostvaruju pravo na njegu i pomoć trećeg lica koji će u narednom periodu, pored postojećih prava, ostvariti pravo i na personalnu asistenciju, koja će na mjesečnom nivou iznositi oko 500 KM. Sva prava na nivou SBK, svake godine sve su veća, jer smo još prošle godine u boračke zakone ugradili odredbu kojom su sva prava boračkih kategorija SBK vezana za rast prosjeka plate i troškova života na nivou Federacije, te će tako ista u 2026. godini biti veća za više od 17%. Pored prava vezanih za Zakon o dopunskim pravima ista podrazumjevaju i prava iz Zakona o egzistencijalnoj naknadi gdje korisnici istog na nivou SBK imaju najveći koeficijent isplata ovih naknada, u odnosu na Federaciju i druge kantone. Izrada proteza i ortopedskih pomagala riješena je na zadovoljstvo RVI amputiraca koji više nisu uslovljeni u kojoj će ortopedskoj kući raditi svoje proteze i druga pomagala, jer im Uprava i ZZO SBK uplaćuju zakonom definisana sredstva za ove namjene. Uprava za BIZ SBK, na zahtjev našeg Saveza, uradila je novi Pravilnik o izradi ortopedskih pomagala kojim su definisali maksimalni vijek trajanja proteza i drugih pomagala u maksimalnom trajanju od tri godine. Premijeru Vlade SBK poslali smo dopis u kojem tražimo da identičan pravilnik usvoji i ZZO SBK, kako bi izbjegli trenutnu "šarolikost" pravilnika kojima se definišu ova boračka prava. Na naš zahtijev, nedavno smo dobili i pozitivan odgovor Ministarstva zdravstva SBK i ZZO SBK koji su takođe umanjili "vijek" trajanja ključnih protetskih pomagala, odnosno došlo je do usaglašavanja navedenih pravilnika, kojima će RVI najveći broj pomagala moći nabavljati svake tri (3) godine. Niti jedan RVI na nivou SBK, kao ni njegova porodica, nije ostao bez prava na zdravstveno osiguranje koje se, ukoliko to nije urađeno ni na koji drugi način, reguliše putem Uprave za BIZ SBK. U svemu navedenom, naš Savez je dao veliki doprinos. Nakon podignute montirane optužnice Kantonalnog tužilaštva, bazirane na pisanjima kojekakvih portala i medija, protiv četiri RVI i dvoje djece šehida, kako smo to i najavili u našem prošlom izvještaju, nakon više od 20 ročišta, Kantonalni sud je donio očekivanu odluku, te je sve optužene oslobodio bilo kakve odgovornosti u ovom procesu. Naravno da o oslobađajućoj presudi niti jedan od portala ili medija koji su popularnost na društvenim mrežama gradili na senzacionalizmu i komentarima fejsbuk stručnjaka nije napisao niti jednu riječ, što nas takođe nije iznenadilo. Na našu žalost, zahvaljujući nezakonitostima Doma zdravlja Travnik i Službe PIO MIO Federacije BiH, koji su RADNO NESPOSOBNOM licu otvarali bolovanje i priznali staž od tri i više godina, čovjek kojem smo valjali, zahvaljujući općinskom i Kantonalnom sudu koji su ga po proglašenju radne nesposobnosti od strane Instituta za medicinsko vještačenje vratili u radni odnos društvu "Apel – Promet", ostvario je NEZASLUŽENU penziju. Na kraju ovog slučaja koji je ponajviše uticao na ljude obuhvaćene optužnicom i njihove porodice, još jednom moramo ponoviti žalolosnu činjenicu da se pored toliko istinskih kriminalaca na nivou SBK, tužilaštvo SBK odlučilo na pokretanje tužbe protiv boračkih kategorija ARBiH. Izgleda da im je to bilo puno lakše, pa su umjesto istinskih kriminalaca, svoju "strogoću" okušali na ljudima čiji su očevi u temelje ove zemlje ugradili vlastite živote, odnosno one, koji su ugradili dijelove svoga tijela i svoje zdravlje. Nakon provedenog sudskog postupka, u kome je njihov "ključni" svjedok potvrdio da je na nezakonit način snimao i prisluškivao predsjednika Saveza u njegovim službenim prostorijama, očekujemo da Tužilaštvo SBK sada uvaži krivičnu prijavu Saveza i protiv istog podigne optužnicu u kojoj će mu sud odrediti kaznu propisanu zakonom za ovo krivično djelo. Za cijelo vrijeme istrage, potom optužnice i trajanja sudskog procesa, redovno je informisano predsjedništvo i Skupština Saveza, koji su o svemu donosili određene Odluke, stavove i zaključke, sve sa ciljem rasta i razvoja Saveza i društva "Apel – Promet" Travnik, u čemu su veliki doprinos dali i svi zaposleni radnici ovih pravnih subjekata. Sva ulaganja radnika uredno su evidentirana, kao

SRVI SBK - Izvještaj o radu za 2025. godinu

i Skupštinska odluka, kojom će se njihova ulaganja u gradnju Centra na određeni način uredno refundirati stavljanjem ovog objekta u njegovu punu funkciju. Očito je da pojedincima i određenim političkim krugovima itekako smeta sve ono što radi Savez RVI SBK i njegovi pravni subjekti, koji i pored svih pritisaka ostaju i opstaju u svom radu, te zapošljavaju preko 30-ak radnika. Navedena gospoda, nakon sudskog postupka, valjda je konačno shvatila da nas nije i neće nikad zaplašiti i da ćemo mi i dalje nastaviti sa našim aktivnostima radi daljeg jačanja naše organizacije i društva, koje će otvaranjem novih djelatnosti nastaviti i sa novim zapošljavanje OSI i drugih boračkih kategorija.

U nastavku ovog našeg izvještaja želimo se posebno zahvaliti Upravi za BIZ SBK na čelu sa direktorom Nijazom Duratbegovićem koji su prepoznali rad i aktivnosti naše organizacije, te izdvojili značajna finansijska sredstva kako bi još više unaprijeili rad Saveza. U ovom izvještaju želimo se posebno zahvaliti ljudima iz Uprave za BIZ SBK, Komisije za boračka pitanja u Skupštini SBK i premijeru Vlade SBK, koji su uvidjeli značaj našeg Centra na Vlašiću, te odlučili da u budžetu Vlade SBK za 2025. godinu uplaniraju sredstva u iznosu od 500.000 KM kako bi konačno završili sve preostale radove na Centru i ovaj objekat stavili u njegovu punu funkciju, te tako omogućili korištenje istog RVI i drugim OSI. Na žalost, zbog određenih proceduralnih problema, te subjektivnih i objektivnih okolnosti, kantonalno ministarstvo finansija tek će u 2026. godini realizovati navedenu odluku Vlade SBK, što će, uz druga sredstva koja ćemo obezbjediti za završne radove na ovom objektu, biti dovoljno da već do kraja ljeta završimo naš Centar i konačno ga stavimo u punu funkciju ljudi zbog kojih se isti i gradi. I ovim našim izvještajem želimo odati veliku zahvalnost načelniku općine Travnik – gosp. Kenanu Dautoviću, koji je, zajedno sa svojim saradnicima, učinio sve da naš objekat dobije i veoma kvalitetan parking prostor. Bez obzira na činjenicu da u prošloj godini nismo dobili planirana sredstva Vlade SBK, radovi na izgradnji Centra nisu obustavljeni, jer su izvođači pojedinih radova na istom aktivnosti provodili vlastitim sredstvima koja ćemo im refundirati po uplati sredstava u 2026. godini. Zahvaljujući toj činjenici, uspjeli smo završiti veliki broj prevashodno unutrašnjih radova na objektu, te asfaltiranje i ogradu parking prostora na objektu, kao i završne radove na izgradnji plinske stanice i uvođenju plinske instalacije u prostoru kuhinje centra. Završili smo i gotovo sve instalaterske radove na objektu, te izvršili sve popravke nastale nemarom i nesposobnošću ranijih izvođača radova na Centru, što nas je koštalo dodatnih 50-60.000 KM. Zahvaljujući Fondu za profesionalnu rehabilitaciju i zapošljavanje OSI, kao i izvođaču radova koji je prihvatio da mu naknadno platimo radove na instalacijama toplotnih pumpi na objektu, pred novu godinu završili smo ugradnju 3 toplotne pumpe i priključak istih na sistem grijanja objekta, što će nam omogućiti puno jeftinije grijanje objekta u narednom periodu. Trenutno se provode određeni građevinski radovi u prostoru garaža i kotlovnice objekta gdje su planirani prostori vešeraja, magacina i postavke agregata za potrebe Centra. Aktivnosti na izgradnji Centra nisu zaustavile druge aktivnosti naše organizacije koja je u prošloj godini uspješno realizovala i sve druge planirane aktivnosti. Jedna od najvećih ali najprofitabilnijih aktivnosti Saveza RVI SBK svakako je organizacija ljetovanja, koja je i u protekloj godini dosta uspješno realizovana, što najbolje pokazuju rezultati ove aktivnosti Saveza izneseni u finansijskom izvještaju istog. Pored pozitivnih finansijskih pokazatelja, veseli nas činjenica da smo i tokom prošle godine za 40-ak naših članova i njihovih porodica obezbjedili sedmodnevno ljetovanje u Gradcu, te takođe nastavili sa održavanjem "Sportskog kampa RVI na moru" kojim svake godine završavamo ovu djelatnost Saveza. Pored Uprave za BIZ SBK i Fonda, moramo posebno istaći Ministarstvo za turizam i okoliš SBK, koji nam je ponovo finansijski pomogao u aktivnostima na izgradnji našeg Centra na Vlašiću. Pored aktivnosti Saveza, želimo istaći naše aktivnosti u okviru rada koordinacije TBO SBK, gdje je Savez jedan od nosilaca svih aktivnosti iste, kako u izgradnji spomen obilježja, tako i obilježavanju značajnih datuma, koji se realizuju na nivou SBK, kao i pojedinih općina SBK, te Federacije, odnosno države Bosne i Hercegovine. Želimo istaći da predstavnici našeg Saveza redovno učestvuju u radu Saveza RVI Federacije BiH, gdje svojim idejama i prijedlozima pokušavaju inicirati određena rješenja trenutnog statusa RVI.

SRVI SBK - Izvještaj o radu za 2025. godinu

Savez RVI SBK i u prošloj godini je ostvario određeni vid saradnje sa Službom za zapošljavanje SBK, putem koje smo ostvarili finansijski poticaj za zapošljavanje jednog radnika iz reda boračkih kategorija.

Svjedoci smo činjenice da pojedini mediji i portali, kao i određeni politički subjekti čine sve da maksimalno otupe, pa čak i ugase rad naše organizacije i naših pravnih subjekata, ali im to zadovoljstvo sigurno nećemo omogućiti. Da je to tako pokazuju i problemi sa kojima smo se nosili i u prošloj godini u kojoj smo ispunili sve svoje obaveze prema Poreskoj upravi Federacije BiH i Upravi za indirektno oporezivanje BiH. Ono što nas boli je ne poštivanje odredbi Zakona o profesionalnoj rehabilitaciji i zapošljavanju OSI kojim su propisani određeni benifiti u radu privrednih društava za zapošljavanje OSI, kojih se niko ne pridržava, zbog čega su ova društva dovedene u isti položaj kao i svi drugi privredni subjekti u BiH. Mada smo prije par mjeseci dostavili jednom broju pravnih subjekata (institucija SBK) određene dopise kojima smo od istih zatražili poštivanje odredbi člana 50. gore navedenog zakona, te ih zamolili da dio svojih potreba u papiru, tonerima i drugom kancelarijskom materijalu nabavljaju od naše knjižare u Travniku, barem za sada od strane tih institucija nismo dobili nikakve odgovore da će to i uraditi u narednom periodu.

Naš Savez je prošle godine obilježio veoma značajan jubilej, odnosno 30 godina svog osnivanja i rada koji smo obilježili nizom manifestacija. Još krajem 2024. godine započele su aktivnosti na prikupljanju arhivske građe za izradu monografije Saveza, koje su nastavljene i u 2025. godini kada smo od naših OORVI dobili određene dopkumente, fotografije i novinske članke o formiranju OORVI SBK, koje smo kasnije uvrstili u sadržaj monografije. U sklopu obilježavanja navedenog jubileja u Fojnici su sredinom juna mjeseca održane, takođe jubilarne, 30. sportske igre RVI SBK na kojima se okupilo preko 250 RVI sportista i mnogobrojnih gostiju sa nivoa SBK, općina SBK i Federacije BiH, koji su mogli uživati u odličnoj atmosferi održavanja igara za šta smo svakako zahvalni i tehničkom organizatoru istih – OORVI Fojnica, kojima se i ovim izvještajem zahvaljujemo. Neposredno prije održavanja ovih igara u Travniku i na Prokoškom jezeru kod Fojnice, upriličeno je druženje RVI SBK kojim smo obilježili 10. juni – Dan Saveza RVI SBK. Pored naših sportskih igara koje su najstarija sportska manifestacija bivših boraca ARBiH, oko 70 RVI SBK bili su aktivni ili pasivni učesnici 20. sportskih igara RVI FBiH koje su se održale u Ajdinovićima, a čiji je domaćin i organizator bio Savez RVI FBiH. Na sjednicama Predsjedništva Saveza RVI SBK, kao i našim učešćem u radu Predsjedništva Saveza RVI FBiH, u više navrata smo isticali i nezadovoljstvo našeg članstva koje smatra da naš krovni Savez može i mora puno efikasnije i više raditi za dobrobit RVI, te na samom očuvanju ovog Saveza, koji je nakon utrošenih grant sredstava zapao u određenu finansijsku krizu.

Niti u ovom izvještaju nećemo izostaviti značaj postojanja Fondacije za pravnu pomoć boračkoj populaciji koja čini maksimalne napore da finansijski pomogne sve one protiv kojih je pokrenuta istraga ili su podignute optužnice zbag navodnih ratnih zločina iz ratnog perioda. Navedena Fondacija takođe pomaže i porodicama naših saboraca koji su nažalost osuđeni za određene ratne zločine zbog čega i u ovom našem izvještaju apelujemo na naše članstvo i druge boračke kategorije da pokažu puno veći interes za rad ove Fondacije, te pomognu njen rad izvajanjem samo 1 KM od svoje invalidnine.

Što se tiče banjsko-rehabilitacionog tretmana, on je već godinama identičan i rješava se procesom realizacije Ugovora između Saveza RVI FBiH i RRC "REUMAL" kojim je omogućeno svakom RVI i njihovim porodicama korištenje banjsko-rehabilitacionog tretmana po dosta povoljnijim uvjetima, uz djelimično vlastito sufinansiranje boravka u Centru ili uz pomoć OORVI ili kantonalnih SRVI, dok 50% troškova snosi Savez RVI FBiH. Uprava za BIZ SBK i dalje omogućava banjsko-rehabilitacioni tretman samo za najteže kategorije RVI paraplegičare i

SRVI SBK - Izvještaj o radu za 2025. godinu

amputirce, dok i dalje traje nezadovoljstvo ostalih kategorija RVI kojima je banjsko–rehabilitacioni tretman često potrebniji nego gore navedenim kategorijama RVI, a koji ovo pravo trenutno mogu koristiti samo uz saglasnost i odobrenje nadležne ljekarske komisije Zavoda zdravstvenog osiguranja SBK. Savez je zajedno sa drugim članicama koordinacije TBO SBK/KSB, na adresu Premijera Vlade SBK, ZZO SBK i Uprave za BIZ SBK uputio dopis kojim je tražio da se u rad ljekarskih komisija uključi i predstavnik navedene koordinacije kako bi se izborili da se znatno većem broju članova boračkih organizacija omogući banjsko-rehabilitacioni tretman putem ZZO SBK.

Stavka stambenog zbrinjavanja boračkih kategorija vraća se u budžet Uprave za BIZ SBK, te se radi novi pravilnik Uprave za BIZ SBK kojim će biti propisan način apliciranja, a potom i korištenja ovih sredstava od strane korisnika istih. Sredstva za liječenje nešto malo su povećana u odnosu na prošlu godinu, a kroz izradu Zakona o dopunskim pravima zatražit ćemo posebna budžetska sredstva kao vid vanredne pomoći kojima bi se puno više pomagalo onkološkim pacijentima, kojih je na žalost sve više unutar boračkih kategorija. Pored navedenog, u funkciji su i kreditna sredstva za stambeno zbrinjavanje boračkih populacija koja je za ove namjene obezbjedila Uprava za BIZ SBK, a koja se realizuju putem ASSA banke u svim općinama SBK.

Uprava za BIZ SBK ove godine je ukinula klasični način dodjele stipendija djeci svih boračkih kategorija, te uvela tzv. pomoć u školovanju kojom će biti obuhvaćena kako djeca u srednjim školama, te studenti, tako i svi oni koji nastavljaju svoje školovanje do magistarskih ili doktorskih zvanja. Ova pomoć više neće biti uslovljena smještajem u studentskim domovima ili nekim drugim uslovima, već će istom, kako je to planirano, biti obuhvaćen znatno veći broj korisnika ovih namjena. Naš Savez i tokom prošle godine nastavio je sa program stipendiranja djece umrlih RVI i drugih boračkih kategorija putem našeg lista. Ova naša aktivnost svakako će biti nastavljena i tokom ove godine.

Pored svega gore navedenog, naša organizacija kao i uvijek do sada bila je nosilac gotovo svih aktivnosti koordinacije TBO SBK u obilježavanju značajnih datuma iz naše bliske prošlosti, kao i drugih državnih i vjerskih praznika. Kao i svake godine do sada i prošle godine provedene su sve planirane aktivnosti na obilježavanju godišnjica 7. korpusa ARBiH, a uzeli smo učešće i u postrojanju jedinica 7. korpusa na Galici. Tokom prošle godine završili smo i sve obaveze prema izvođaču radova monumentalnog spomenika oslobođiocima Vlašića koji je postavljen na Galici. Mi smo u navedenim aktivnostima dali svoj doprinos, a to ćemo nastaviti i u tekućoj godini, kako na obilježavanju godišnjice formiranja 7. korpusa, tako i 15. aprila -Dana ARBiH, te 16. aprila – godišnjice stradanja Bošnjaka u selu Ahmići, gdje su i prošle godine članovi koordinacije TBO SBK ARBiH obišli Ahmiće i položili cvijeće na spomen obilježje svim žrtvama ovog mjesta stradalim od strane pripadnika HVO u aprilu 1993 godine. Zajedno sa drugim TBO SBK i Islamskom zajednicom BiH uzeli smo aktivno učešće na obilježavanju "Dana šehida" kada se na centralnom šehidskom mezarju u Travniku okupio veliki broj građana Travnika, ali i Prijedora, Sanskog Mosta i drugih gradova Bosanske krajine, kako bi se učenjem jasina i dova sjetili svih šehida i poginulih boraca ARBiH. Pored navedenih datuma, na prijedlog Saveza, ostali članovi koordinacije TBO SBK ARBiH zauzeli su stav da u buduće na puno većem nivou budemo uključeni u obilježavanje 25. novembra – Dana državnosti BiH i 1. marta – Dana nezavisnosti BiH. Koordinacija je krajem prošle godine u saradnji sa drugim boračkim organizacijama i po odluci OO za obilježavanje značajnih datuma SBK učestvovala u izradi i štampanju priručnika za učenike završnog razreda OŠ SBK, koji nastavu pohađaju na Bosanskom jeziku. U istom, kao i dodatnim skriptama i bilježnicama, u čijoj izradi i štampanju će učestvovati koordinacija TBO, bit će posebno obrađeni svi gore navedeni značajni datumi, te provedeno kviz – takmičenje na nivou SBK kako bi mladi bili što više informisani o značaju navedenih datuma, a potom i involvirani u sve aktivnosti na obilježavanju

SRVI SBK - Izvještaj o radu za 2025. godinu

istih, jer će za koju godinu, baš oni, morati nastaviti sa tradicijom obilježavanju ovih datuma. Već se uveliko vode pripreme na obilježavanju godišnjice formiranja 7. korpusa ARBiH, te obilježavanju 15. aprila – Dana Armije RBiH.

Pored sportskih igara RVI SBK i sportskih igara RVI FBiH, Savez je i tokom 2025. godine omogućio svim RVI i drugim invalidima sportistima da učestvuju na gotovo svim državnim i KUP takmičenjima BiH u svim sportskim disciplinama u kojima se takmiče OSI. Naši invalidi sportisti ove godine u pojedinim sportskim disciplinama kao što su pikado, šah i mali nogomet, ostvarili su i neke zavidne rezultata, te dostojanstveno predstavljali naš kanton na svim sportskim takmičenjima. Naš moto učešća na svim sportskim takmičenjima dali smo druženju i fer plej, pa tek onda na nekim sportskim rezultatima. Rad našeg Saveza na polju sporta i sportskih aktivnosti našeg članstva, prepoznat je od strane Sportskih saveza na nivou Federacije BiH i SBK, pa je naš Savez na manifestaciji Izborna invalida sportiste BiH za 2025. godinu, koja je održana 17.12.2025. godine na Ilidži, dobio posebno priznanje zbog svojih aktivnosti i učešća na mnogobrojnim sportskim takmičenjima. Čovjek koji je najzaslužniji za oblast sporta na našem kantonu, gosp. Suvad Merdan, takođe je nagrađen posebnim priznanjem sportskog radnika u oblasti sporta OSI BiH. Naš rad i aktivnosti prepoznati su i na nivou SBK, te je Sportski savez SBK na manifestaciji Izborna sportiste SBK, održanoj u Jajcu sredinom februara, dodjelio posebnu plaketu za zasluga i postignutih rezultata u oblasti sporta OSI na našem kantonu našem članu Suvadu Merdanu. Naš savez bio je domaćin državnog prvenstva u pikadu za OSI koje je održano u Jajcu, a na naš prijedlog, Sportski savez invalida Federacije BiH, prihvatio je naš zahtijev da u buduće domaćin KUP-a BiH u šahu bude naša organizacija. Isti bi se održavao pod nazivom "Memorijal Ifet Kunić" i bio bi održavan na našem kantonu svake godine u znak sjećanja na bivšeg predsjednika našeg Saveza. Prvi memorijal bit će održan 2026. godine, baš u rodnom mjestu rahmetli Ifeta Kunića, u Novom Travniku, u čemu svakako očekujemo podršku OORVI Novi Travnik, čiji je Ifet bio dugogodišnji predsjednik. Predstavници našeg Saveza redovno učestvuju u radu organa i tijela Sportskog saveza invalida Federacije BiH i Paraolimpiskog komiteta BiH, dajući i tako svoj prilog ulozi sporta u životu svih OSI.

Kako u protekloj godini nije bilo nikakvih smetnji sa ulaskom u R Hrvatsku veoma uspješno smo nastavili sa našom najvažnijom aktivnosti – organizacijom ljetovanja. O značaju ovih aktivnosti naše organizacije ponajbolje govore ostvareni finansijski efekti u oblasti organizacije ljetovanja, koji su 2025. godine ako ne najveći, onda su sigurno u kategoriji onih iz najboljeg perioda ove djelatnosti. Ova aktivnost Saveza nastavit će se i u tekućoj godini u kojoj očekujemo još bolje finansijske efekte.

Savez RVI SBK bez obzira na činjenicu da OORVI SBK ni u prošloj godini nisu ispunile svoje obaveze po pitanju uplata članarine Savezu, uspio je obezbjediti, što lično, što putem svojih pravnih subjekata neophodna finansijska sredstva koje je i ove godine između ostalog podjelio članstvu, ali i pomogao rad gotovo svih OORVI SBK.

Sredstva na ime iftara ove godine u vidu paketa prehrane uručili smo za 10 porodica RVI u Bugojnu. Na kraju ovog Izvještaja, moramo istaći aktivnosti u obilježavanju godišnjica stradanja Srebrenice i Kotor Varoša, gdje su naši predstavnici i ove godine uzeli aktivno učešće u istima.

Prije nego li završimo ovaj naš izvještaj, želimo istaći i druge aktivnosti koje smo poduzeli u sklopu obilježavanja 30. godišnjice Saveza. Pored već gore pobrojanih aktivnosti u završnoj fazi obilježavanja našeg jubileja, završili smo štampu "Monografije" te na dan formiranja Saveza RVI SBK, 16.12.2025. godine u velikoj sali Centra za kulturu općine Travnik organizovali našu svečanu Skupštinu, kojoj je prisustvovao veliki broj delegata skupštine i drugih RVI, te veliki broj gostiju sa

SRVI SBK - Izvještaj o radu za 2025. godinu

svih nivoa vlasti na čelu sa premijerom Vlade SBK gosp. Tahiom Lendom. Na ovoj skupštini iznijeli smo naš rad i rezultate u proteklih 30 godina, ali se i prisjetili ljudi kojih danas više nema, a koji su u proteklom periodu dali veliki doprinos u radu i aktivnostima našeg Saveza. Našu skupštinu, pored podjele "Monografije" posvećene 30-toj godišnjici Saveza, iskoristili smo da velikom broju pojedinaca i institucija uručimo zaslužne plakete i priznanja u znak zahvalnosti na njihovoj podršci i pomoći koju su pružali i pružaju našem Savezu.

Mi se nadamo da smo i pored svih evidentnih poteškoća ipak opravdali očekivanja u radu Saveza, te ćemo se potruditi da u narednom periodu, uz svesrdnu pomoć ostalih pravnih subjekata u vlasništvu saveza, kao i Uprave za BIZ SBK, Fonda i drugih donatora obezbjedimo još bolje rezultate u našem radu.

S poštovanjem

**Predsjednik Saveza RVI – SBK
Ekrem Julardžija**